

Regional News Unit AIR Aizawl
Wednesday, April 10, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizorama Lok Sabha inthlanpui campaign chuan a vawrtawp a thleng chho mek
- Ramchhung hmun dangah pawh political party lian ten nasa takin tan an la mek.
- Lawngtlai Districtah Lok Sabha Inthlanpui thawh khatna tun thla ni 19-a vote thlak turah vote thlak ngei tura a huhova intiamna buatsaih a ni.



CAMPAIGN

Mizoram Lok Sabha MP inthlan atana campaign chuan a vawrtawp a thleng chho tan a, Political Party leh an candidate ten theihtawp chhuahin mipui vote ngawrh takin an zawng mek a ni.

ZPM Party chuan nimin khan Hnahthial-ah Street Campaign an nei a, ZPM party official candidate Pu Richard Vanlalmangaiha chuan thusawiin thlan tlin a nih chuan ramim hmasawnaa rotling a neih theihna turin theihtawp a chhuah dawn a, Mizoram sorkar leh sorkar laipui inkara indawrnaah leihlawnah a tang dawn a ti a. Mizoram chung leh pawn lam tana tangkai thei ang berin hna thawk turin a pen chhuak dawn a ni, a ti a. Sawrkar tharah kuthnathawktute chawikan nan hma nasa taka lak a ni dawn tih sawiin, tun lai thiamna leh khawl changkang zawk hmangin loneitute tana awlsam leh hlawk zawka thlai thar sawngbawl dante pawh ngaihtuah a ni zel dawn a. Chumi atan chuan sorkar laipui hnuai kuthnathawktute tana hamthatna awmte tun aia nasa zawka haichhuah an tum dawn a ti.

ZPM leader, Chief Minister Pu Lalduhoma pawhin Saikawrdai tlangdunga Lok Sabha MP inthlan lo awm tura campaign beihpui a thlaknaah thusawiin, Sawrkar hmasa MNF-in Kolkata khawpui, Ballygunge road-a Mizoram House an hralh ngawt mai kha a pawh takzet a, Zoram Mipuite rilru ana hle a, anni chuan hralh an phal lo a ti a. Neih belh aia neihsa tiral zawnga an khawsa chu a mak hle a, High Court-ah thiam chang lo mah se, Mizoram mipuite tan Court sang zawk Supreme Court thlengin a tul angin zelin kal an tum a, a tawp an thleng dawn tih a sawi a ni.

MNF MP candidate Pu K.Vanlalvena, Rajya Sabha MP leh amah tawiwmtu MNF Senior Vice President, Dr.R.Lalthangliana te chuan nimin khan Tlabung leh Chawngte fangin Street campaign an nei a. Pu K.Vanlalvena chuan thu sawiin Covid vang lai a MP tan tir ve chauh a ni a. A zin ve pawhin a haw velah kar khat chuang zet te quarantine a ni thin a, kum 3 leh thla 8 MP a nih chhung khan Mizoram tan thil tha tam tak tih duhin development work-te pawh hai chhuah duh mah se; MP a nih chhung khan ram tan a duh angin thil tha a ti hman lo a, hreawm a ti hle a tih a sawi a ni. Pu Vanlalvena chuan Zo hnahthlak hnam hrang hrangte insuihkawm chu a duh ber leh a tum lian berte zinga mi anih thu a sawi bawk.

Manipur Meitei unau te, Assam sorkar leh Myanmar sipaite huat hlauh khawpin Zo hnahthlak te thlavang a hauh tawh tih sawiin Delhi thlengin Assam Police-ten an umzui a, a nunna atana hlauhawm khawpin beih a tawk a, ram tan chuan thih pawh a hlau lo niin a sawi a. Meitei leh Myanmar sipaite nasa taka huat a hlauh tih sawi bawkin an thlavang hauhsakten an hnawl loh a beisei tih a sawi a ni.

Mizoram State BJP President Pu Vanlalhmuaka chuan Lawngtlai Press Club ah thutharthehdarhtute kawmin, Lairam ah hmasawna tluantling a luanluh theihnan LADC a MDC te chu BJP Sorkar dinpuiah a sawm a, MADC ah chuan BJP in rinna a nghah ngam vangin hmasawna luangluttur tamtak a awm mek a ti.

BJP, MP Candidate Pu Vanlalhmuaka chuan Lok Sabha inthlanpuiah thlantlin a nih chuan Mizoram tan awmzenei tham hmasawna hailuh chu a tan thilhar a ni dawnlo tih sawiin, Central ah BJP bak sorkar tur an awm rih lova, Mizoram ah BJP Candidate thlantlin a nih chuan a diltu nilovin, a petutur Sorkar neitu a nih dawn vangin Mizoram tan engmah thil harsa a awmdawnlo niin a sawi.

Zawhna chhangin Pu Vanlalhmuaka chuan Mizoram leh Assam ramri chinfel nan dawhkankila, awmzeneia kalpui tul a tih thu a sawi a, Mizo Kristian ten BJP chu insawithaihnan an hman chhan chu BJP lianzel tur dona mai a ni a, India chu Hindu ram nisa a ni a, a hranpaa Hindu ram din tulna a awm lova, Kristiante chuan Hindu hlau tawk lek rinna an neih kalsanin engkimtithi Pathian ah rinna an nghah ngam zawk a tul a ni a ti a, Kristiante tan Pathian lalram dinna tur pawn BJP, MP Mizoram in a neih a tul a ni a ti bawk.

INC Official Candidate Pu Lalbiakzama chuan Central-ah BJP an sorkar leh a nih chuan India ram democracy hi a ngaihtuahawm hle a nga, Election hian awmzia a awmlo thuai ang a ti a. Khawzawl Vengthar Bazarah INC Party chuan street campaign an neih naah thusawiin, Pu Lalbiakzama chuan tun dinhmunah BJP rorelna hnuaiyah hhawvel ramdangte mit hmuhah pawh India democracy hi a hniam tawh hle a ni, a ti. Pu Lalbiakzama chuan Manipur unaute tawrhna hre reng chung a Vawiin thlengin NHRC an la inrawlh lo chu mak atih thu sawiin. Heti khawpa an tawrh lai hian 'Dan' chu a muthlu a nih nia a hriat thu sawiin Tribal nihna avanga an complaints-in awmzia a neih tawh loh dan ngaihtuah hian mizote hikan him reng a ngem tih hi ngaihtuah tham a ni a ti.

<><><>

LS CAMPAIGN

Ramchhung hmundangah pawh Political party lian ber ber hruaitute chuan ram chhung hmun hrang hrang an fang kual a, an party candidate-te tan vantlang inkhawm leh roadshow an nei bawk.

BJP senior leader leh Prime Minister Narendra Modi chuan nimin tlai khan Chennai-ah road show hmangin ni hnih chamin Tamilnadu a tlawh a,

Vawiin atang hian BJP campaigner Pu Modi chuan vantlang inkhawm wawi hnih, Coimbatore bula Vellore leh Mettupalayam-ah thu a sawi ang.

<><><>

SERCHHIP MALARIA

Malaria umbo beihpui thlakna kal zelah Serchhip a Kohhran hruaitute leh NGO hrang hrang aiawhte tan nimin khan 'District Task Force on Malaria Elimination Programme'an hmang a. He Programme hi Serchhip a District Vector Borne Disease Control Programme (DVBDCP)' te bultumin CMO Conference Hall ah neih a ni a, Deputy CMO Dr Lallawmkimi Chhakchhuak chuan a kaihuai a ni.

He hunah hian Serchhip CMO Pu LP Malsawma chuan Malaria umbo anih theih nan leh hemi chungchang inzirir tur hian tunlai khawvelah inkohkhawm a harsat tawh thu leh mipui ai awh zo thei tur an ngaih Kohhran hrang hrang atanga Pastor Bial hrang hrang aiawhte leh NGO aiawhte chu kokhawm mai an nih thu a sawi a.

Malaria avanga harsatna leh thihna hial thleng thin chungchangah Mizoram hmundangte aiin Serchhip chu kan ziaawm deuh nia a lan thu te, mitin ten kan theih kawngah theuh leh phak tawk theuhah tan la a, Malaria natna umbo kawngah mipuite tanrual a pawimawh thu a sawi a.

He hunah vek hian District Vector Borne Disease Control Programme(DVBDCP) District Consultatant Pi lalchhuanawmi Khiangte chuan Serchhip District dinhmun tlangpui a tarlang a. Report atanga a landanin nikum chhung khan Serchhip District-a mihring cheng za zelah 38.71 thisen exam a ni a, heng zingah hian Malaria vei 47 hmuhchhuah a ni a. Malaria vei 47 atang hian 19 chu Malaria pf niin, Serchhip District ah Annual Parasitic Incidence (API) hi kum kalta khan 0.67 a ni bawkin heng zinga 1 hian Malaria natna avangin nunna a chan bawk a ni.



LAWNGTLAI MASS PLEDGE

Lawngtlai District hmun hrang hrangah Lok Sabha Inthlanpui, 2024 lo awm tura a thawh khatnaa tun thla ni 19-a vote thlak turah vote thlak ngei tura a huhova intiamna, mass pledge taking buatsaih a ni.

Lawngtlai District Election Officer Pu Cheemala Siva Gopal Reddy ruahmannain Lawngtlai District-a sawrkar office hrang hrang leh khaw hrang hrangah MP Inthlanpui vote thlak tura intiamna hi kalpui a ni a. Lawngtlai DC office-a thawkte chuan DC office tualah Additional DC Pi B. Malsawmtluangi hovin thutiamna hun hi an hmang a. LADC leh CADC office pui bakah, Lawngtlai District chhunga sawrkar office, sikul leh bank hrang hrangah te thutiamna hun hi hman ni bawkin, Lawngtlai DRDO office bul tumin District chhung khaw hrang hrangah khaw mipuite'n vote thlak tura thutiamna hun an hmang bawk.

He thutiamna hun hi Inthlanpui lo awm tura Lawngtlai District-a vote tla a that leh zual theih nana ruahman a ni a. Vote tla a that theih nan hian District Election Office chuan kanwg hrang hrangin hma a la chho mek a ni.



HOME VOTING

Lok Sabha inthlanpui atan Aizawl District chhunga Home Voting kalpui mek chu nimin khan District Election Officer, Aizawl Bawrhsap Pi Nazuk Kumar chuan a enpui.

Pi Nazuk Kumar chuan vote nei tawh phawt in vote an thlak theih a, taksa lama harsatna nei, a bik takin kum upa lam leh vohbik te tan pawh in atanga vote an thlak theihna tura ruahmanna siam a nih thu a sawi a. Voter te pawhin he ruahmanna hi an hmang tangkai a beisei thu sawiin, home voting ti lo lo zawng chuan April ni 19 ah mahni polling station pan a vote thlak theuh turin mipui a sawm bawk.

Pi Nazuk Kumar I hian Aizawl North-I a tlawh a. Voter te nen inkawm in, polling station pan tura an taksa chawk tawk loh avanga harsatna an tawh thu leh hetiang an tan ruahmanna siam a ni ta chu lawmawm an tih thu an sawi a ni.

Aizawl district ah hian Assembly Segment sawm leh pahnih (12) tan niminpiah atang khan Home Voting kalpui tan niin, vawiin thleng aw h tura ruahman a ni.

Mamit District chhunga kum lama upa zawk kum 85 chunglam leh pianphunga rualbanlo/awmhmun sawn harsatte tan an awmhmuna kalchilha vote an thlak theihna Home Voting chu nimin khan tan a ni a, Mamit District chhunga Voter 112-te vote thlak tir an ni.

Election Commission of India-in ruahmanna siam angin kum lama upa zawk leh PwD Voters te hi anmahni bialtu theuh Booth Level Officer (BLO) kaltlangin District Election Office-ah vote an thlak theihna tur dilna thawn hmasak niin heta tang hian PwD voters 30 leh kum lama upa zawk kum 85 leh a chunglam voter 82 te chu vote thlak tir an ni.

Home voting atana Polling officials te hi minin dar 7:00 khan District Election Office atangin Mamit District chhung Constituency pathum Hachhek, Dampa leh Mamit ah te an fehchhuak a ni.

Home Voting atana kalchilhtu Polling Official te hi Political party hrang hrang aiawh Agent-te leh BLO te'n an tawiawm a ni.

<><><>

KEJRIWAL

. Zu policy scam a sum tih chingpen chungchang a an man na leh Enforcement Directorate kut hlan anih chungchang Delhi Chief Minister Arvind Kejriwal-an a khinna chu Delhi high court chuan a hnawlsak a.

Justice Swarana Kanta Sharma chuan enforcement directorate te chuan fin fiah na tha tawk an neih thu leh Goa inthlanpui a tan pawisa pek anih thu AAP candidate ngei statement a awm thu a sawi a.

Arvind Kejriwal chuan inthlan dawn hnaih tak a man a nih chungchang sawiin, Court chuan a man hun tur chungchangah ED lamin tum an nei ran ni a a lan loh avangin hnial theih a ni lo a ti a ni.

Kejriwal hi judicial custody ah awm mek in march ni 21 zan khan man a ni a, march ni 22 khan a chungchang hi ngaihtuah niin court chuan ED custody ah ni 6 chhung awm tur in a rel a a hnu ah ni 4 chhung a pawt sei leh ani. Tun thla ni 1 khan judicial custody ah dah leh a ni a, hei hi April ni 15 thleng awm tur a tih a ni.

<><><>

Akashvani Aizawl Regional News Unit chuan Whatsapp ah chanchinthar ngaihthlak theih turin a chhawp chhuak a, All India Radio News, Aizawl channel link hi AIRNews facebook page ah leh X ah te hmuh theih a ni.

<><><>